



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՈՍՏԻԿԱՆՈՒԹՅԱՆ
ՊԱՐԵԿԱՅԻՆ ԾԱՌԱՅՈՒԹՅՈՒՆ**

0090, ք. Երևան, Շոպրոնի 77

N 91/5144

< 02 > 09 2022թ.

Էդվարդ Վահանի Փանոսյանին
Հասցե՝ Կոտայքի մարզ, գ. Առինջ, Մաշտոցի 33 տուն.

Ուղարկում եմ Ձեր դիմումի հիման վրա ՀՀ ոստիկանության պարեկային ծառայության իրավաբանական բաժանմունքում իրականացված վարչական բողոքարկման վարույթի արդյունքում կայացված թիվ 8200114091 վարչական ակտը բեկանելու և վարչական իրավախախտման վերաբերյալ գործի վարույթը կարճելու մասին որոշումը:

Առդիր՝ << 3 > թերթ:

Պետ,
Ոստիկանության գնդապետ՝

Ա. Ումրշատյան

Կատ. Ն. Քոչարյան

Ո Ր Ո Շ ՈՒ Մ

ՀՀ ոստիկանության պարեկային ծառայության վարչական իրավախախտման վերաբերյալ գործով 25.02.2022թ.-ին կայացված թիվ 8200114091 որոշումը բեկանելու և վարչական իրավախախտման վերաբերյալ գործի վարույթը կարճելու մասին

<< 06 >> 04 2022թ.

ք.Երևան

ՀՀ ոստիկանության պարեկային ծառայության պետ, ոստիկանության գնդապետ Ա. Ումրշատյանս, վերանայելով Էդվարդ Վահանի Փանոսյանի (Ծանուցման հասցե՝ Կոտայքի մարզ, գ. Առինջ, Մաշտոցի 33 տուն.) (Այսուհետ՝ դիմող) 11.03.2022թ. դիմումի հիման վրա հարուցված վարչական բողոքարկման վարույթի նյութերը,

Պ Ա Ր Զ Ե Ց Ի

25.02.2022թ.-ին՝ ժամը 14:31-ի սահմաններում, Երևան քաղաքի Տիգրան Մեծի պողոտայում դիմողը «Կիա» մակնիշի 77 ՎՕ 505 հաշվառման համարանիշի տրանսպորտային միջոցը վարել է առանց գործող ԱՊՊԱ պայմանագիր: ՀՀ ոստիկանության պարեկային ծառայության Երևան քաղաքի գնդի 3-րդ գումարտակի 3-րդ վաշտի պարեկ Դավիթ Արտակի Մադոյանի կողմից վարորդի նկատմամբ կազմվել է վարչական իրավախախտման վերաբերյալ արձանագրություն՝ «Վարչական իրավախախտումների վերաբերյալ» ՀՀ օրենսգրքի 129.2-րդ հոդվածի 2-րդ մասի համաձայն և կայացվել է թիվ 8200114091 որոշումը՝ դիմողին 100.000 ՀՀ դրամի չափով տուգանելու մասին:

Դիմողը 11.03.2022թ.-ի դիմումով խնդրել է անվավեր ճանաչել պարեկային ծառայության վարչական իրավախախտման վերաբերյալ գործով 25.02.2022թ. կայացված թիվ 8200114091 որոշումը՝ մասնավորապես նշելով, որ տրանսպորտային միջոցը արձանագրություն կազմելու պահին ունեցել է գործող ԱՊՊԱ պայմանագիր, սակայն կատարվել է հաշվառման համարանիշերի փոփոխություն: Դիմումին կից ներկայացրել ԱՊՊԱ պայմանագրի և Թիվ 1 համաձայնագրի պատճենները:

Ղեկավարվելով «Վարչարարության հիմունքների և վարչական վարույթի մասին» ՀՀ օրենքի 37-րդ հոդվածի պահանջներով՝ քննության են առնվել իրավախախտման բոլոր, այդ թվում՝ դիմումատուի օգտին առկա փաստական հանգամանքները, ինչի արդյունքում պարզվել է, որ վարչական իրավախախտման վերաբերյալ գործով

25.02.2022թ. կայացված թիվ 8200114091 որոշումը ենթակա է բեկանման՝ հետևյալ պատճառաբանությամբ.

«Վարչարարության հիմունքների և վարչական վարույթի մասին» ՀՀ օրենքի 38-րդ հոդվածով սահմանված կարգով վարչական վարույթում քննարկվող փաստական հանգամանքների վերաբերյալ արտահայտվելու և լսված լինելու հնարավորություն տալու նպատակով դիմողին ուղարկվել է ծանուցում՝ վարչական լսման օրվա և ժամի վերաբերյալ:

«Ավտոտրանսպորտային միջոցների օգտագործումից բխող պատասխանատվության պարտադիր ապահովագրության մասին» ՀՀ օրենքի 5-րդ հոդվածի 4-րդ մասի համաձայն՝ յուրաքանչյուր անձ պետք է մշտապես ունենա սեփականության իրավունքով իրեն պատկանող (ֆինանսական վարձակալության (լիզինգի) պայմանագրով իրեն տրամադրված) և Հայաստանի Հանրապետությունում հաշվառված յուրաքանչյուր ավտոտրանսպորտային միջոցի համար կնքված և գործող ԱՊՊԱ պայմանագիր: Արգելվում է ընդհանուր օգտագործման ավտոմոբիլային ճանապարհներով ավտոտրանսպորտային միջոցի վարումը, եթե դրա համար առկա չէ այն վարելու պահին գործող ԱՊՊԱ պայմանագիր:

«Վարչական իրավախախտումների վերաբերյալ» ՀՀ օրենսգրքի 129.2-րդ հոդվածի 2-րդ մասի համաձայն՝ առանց տվյալ տրանսպորտային միջոցի համար կնքված ավտոտրանսպորտային միջոցի օգտագործումից բխող պատասխանատվության պարտադիր ապահովագրության գործող պայմանագիր ունենալու՝ Հայաստանի Հանրապետության տարածքում ընդհանուր օգտագործման ավտոմոբիլային ճանապարհներով տրանսպորտային միջոցը վարելը՝ առաջացնում է տուգանքի նշանակում՝ սահմանված նվազագույն աշխատավարձի հարյուրապատիկի չափով:

Պարեկային ծառայողների կողմից տրված պարզաբանման համաձայն՝ դիմողի կողմից տրանսպորտային միջոցն առանց գործող ԱՊՊԱ պայմանագիր վարելու փաստը արտացոլվել է ՃՈ Էլեկտրոնային ռեգիստրում, որի արդյունքում էլ կայացվել է համապատասխան որոշումը:

Ուսումնասիրելով դիմողի կողմից ներկայացված փաստաթղթերը, պարզ է դառնում, որ «Մերսեդես» մակնիշի 77 VO 505 հաշվառման համարանիշերով տրանսպորտային միջոցը ունեցել է գործող ԱՊՊԱ պայմանագիր: Վերը նշված տրանսպորտային միջոցը «Ռեսո ինշուրանս» ԱՓԲ-ի հետ կնքել է SM 466718 ԱՊՊԱ պայմանագիր 35 QX 165 հաշվառման համարանիշերով, որը ուժի մեջ է 07.07.2021թ.-ից մինչև 06.07.2022թ.-ը: Համաձայն «Ռեսո ինշուրանս» ԱՓԲ-ի կողմից տրված Թիվ 1 համաձայնագրի՝ տրանսպորտային միջոցի վրա կատարվել է հաշվառման համարանիշերի փոփոխություն և տեղադրվել է 77 VO 505 հաշվառման համարանիշերը:

Ըստ ՀՀ կառավարության 1251 որոշմամբ հաստատված ՃՈ Էլեկտրոնային ռեգիստրի և Հայաստանի ապահովագրական ընկերությունների

ավտոապահովագրական «ASWA» էլեկտրոնային կայքէջի տվյալների՝ «Մերսեդես» մակնիշի 77 VO 505 հաշվառման համարանիշի տրանսպորտային միջոցը 25.02.2022թ.-ին՝ ժամը 14:31-ին, վարչական իրավախախտման վերաբերյալ արձանագրություն կազմելու պահին, ունեցել է գործող ԱՊՊԱ պայմանագիր:

«Վարչական իրավախախտումների վերաբերյալ» ՀՀ օրենսգրքի 247-րդ հոդվածի 1-ին կետի համաձայն՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման եթե բացակայում է վարչական իրավախախտման դեպքը կամ կազմը:

Այսպիսով, ելնելով վերոգրյալից և ղեկավարվելով «Վարչական իրավախախտումների վերաբերյալ» ՀՀ օրենսգրքի 247-րդ հոդվածի 1-ին մասով և 293-րդ հոդվածի 1-ին մասի 3-րդ կետով՝

Ո Ր Ո Շ Ե Ց Ի

1. Պարեկային ծառայության վարչական իրավախախտման վերաբերյալ գործով 25.02.2022թ. կայացված թիվ 8200114091 որոշումը բեկանել և վարչական իրավախախտման վերաբերյալ գործի վարույթը կարճել:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում:
3. Սույն որոշման օրինակն ուղարկել դիմողին և պարեկային ծառայության Երևան քաղաքի գունդ:

Պետ,
նստիկանության գնդապետ՝



Ա. Ումրշատյան